

清

史

稿

清史稿

列傳二百三十五

丁日昌

下寶第

涂宗瀛

黎培敬

崧駿

崧蕃

邊寶泉

于蔭霖

饒應祺

惲祖翼

丁日昌字禹生廣東豐順人以廩貢生治鄉剛毅卻潮州寇選瓊州府學訓導錄功叙知縣補江西萬安善折獄坐吉安不守罷免參曾國藩戎幕復官李鴻章治軍上海檄主機器局積助至知府江甯既下除蘇松太道鴻章倚以辦外交事有鈞棘徐起應付率皆就範調兩淮鹽運使准鹽故弊數至則禁私販糾貪吏鬯運道歲入驟增同治六年擢布政使授巡撫江南戎燧後庶政不緝日昌集流亡除豪猾設月報詞訟冊定錢漕科則下其法各省又以州縣爲親民官疏請設局編刻牧令諸書八年奉敕訓勉臣工日昌條上六事曰舉賢才汰

虛冗益廉俸選書吏輸漕粟變武科言合旨要遭憂歸光緒元年起授福建巡撫兼督船政辭不允既莅事會墜兩城內水逸丈躬散賑口煦手拊卵翼備至全濟災民數十萬衆感泣僉曰活我者丁中丞也時臺灣生番未靖遂力疾渡臺自北而南所至扶服蟻伏惟鳳山轄境悉芒社及獅頭龜紋諸社素梗化遣兵討平之爲立善後章程皆遵約束中路水埔六社不諳樹藝履漢民代耕謂之租墾復令有司計口給銀米教之耕作廣設義學教之識字又罷臺屬漁戶稅擬築鐵路開礦產移關稅釐權造船械臺民漸喁喁望治矣還閩移疾去吏民啼泣遮道四年疾稍閒被命赴福州理烏石山教案先是道光間英人就山築室傳教疆吏不能爭以山在城外飾詞入告厥後占地愈廣閩人忿幾釀變日昌撫閩與力爭議易以城外電局空地未及行遽解職英人占如故閩人不能忍聚衆燬教堂英使責難亟至是命日昌往按鈎稽舊案獲教士侵地左證與英領事往復詰辯卒徙教堂城外閩人鑊石刊績焉逾歲還里明年詔加總督銜令駐南洋會辦海防水師統歸節度復命充兼理各國事務大臣以疾辭

不許八年卒卹如制日昌性孝友撫吳日母黃年九十矣迎養署中孺慕如兒時兄寢疾藥饋躬侍兄止之則引李勣焚纒事爲喻好藏書成持靜齋書目五卷世比之范氏天一閣黃氏百宋一廬云子五人惠康最著好學多泛覽有丁徵君遺集

下賈第字頌臣江蘇儀徵人咸豐元年舉人入貲爲刑部主事累遷郎中浙江道監察御史軍興官吏多避罪冒功奏請檢視各省兵糧數目攻守要害及失陷收復時日功罪以資稽覈其有獲罪之員藉事開復保升宜嚴定限制又言苗沛霖王來鳳乍服乍叛宜專意主剿上皆聽之同治元年遷禮科給事中劾江北水師總統黃彬侵竄通賊督辦軍務侍郎勝保貪窳提督成明擁兵同州蕙無戰志一時推爲敢言擢順天府府丞遷府尹捕巨盜王景隆等五年乞開缺養親不允出爲河南布政使擢福建巡撫時粵寇初平游勇土匪肆掠疏請就地正法報可九年再乞終養許之光緒八年起湖南巡撫平江方雪璣龍陽曹小湖安鄉周萬益張景來皆盜魁也陰結徒黨號哥老會賈第悉寘之法署

湖廣總督法人侵越南詔借巡撫彭祖賢治江防築礮臺田家鎮南北岸各三座繪具圖說上之時議建樊口石閘寶第以謂樊口內有梁子諸湖袤延八百里水皆無源江入其中潴爲巨浸以民情論重在堵江水之入不在洩內水之出以地勢論江水驟失此潴瀦八百里地則下游隄防必致沖決請緩建石閘而漸除樊口內窪田額賦得旨允行十一年還湖南巡撫任法人款成寶第上言各國通商因利乘便須具臥薪嘗膽之志爲苞桑陰雨之謀因條上求才裕餉船政器械四事又言國家財用歲出大宗莫如兵勇並設直省旗綠各營兵額七十七萬每年薪糧銀一千數百萬兩養兵既多費饟尤巨兵多則力弱饟巨則國貧粵逆初起金田僅二千人廣西額兵二萬三千土兵一萬四千乃以三萬七千之兵不能擊二千之賊廣西兵不可用他省可推其後髮捻田苗等匪悉賴湘淮管勇勘定綠營戰績無聞大亂甫夷伏莽未盡兵不得力勇難驟撤于是歲支勇糧一千餘萬賦入有常豈能堪此耗費查綠營馬兵每月一兩九錢戰兵一兩四錢守兵九錢零月餉無多必謀別業遂弛專操軍情瞬變調

發遷延臣擬請裁額併糧以兩額挑養一兵如額兵一萬半爲駐守半赴巡防
互相遞戍共習辛勤常則計日操演變則隨時援應副參任管官都守充哨弁
室家無累而後紀律可嚴此宜變通管制者一也兵擬減額原設將弁亦應核
減綠營將弁歲領廉俸雜項職大者可抵白兵數十兵小者亦抵十餘兵自來
積弊隱匿空糧攤扣月餉左右役使無非額兵裁汰之憾自非將弁所樂擬請
先裁將弁以併營管兵必多乃漸裁兵老弱事故缺出停補俟空千名即補精
壯五百綠營不足簡撥營勇作爲練軍不啓兵衆之疑自無阻撓之慮此宜逐
漸辦理者又一也目前兵尙未練勇已議裁若欲節餉則裁勇不足資緩急裁
兵爲有備而無患下部議行十四年擢閩浙總督兼管福建船政十八年以疾
解職卒於家寶第有威重不爲小謹駟從其盛所至誅劔姦猾扶植良愿民尤
感之子緒昌戶部七品小京官

涂宗瀛號朗軒安徽六安人以舉人銓江蘇知縣曾國藩督兩江檄主軍精累
保授江甯知府同治九年擢蘇松太道明年遷湖南按察使湘民故健訟都察

院歲所下獄輒逾百數宗瀛爲立條教尤首悔懲誣告並嚴定審理功過章程弊乃稍革晉布政使仿朱子社會法建立長沙府倉光緒三年拜廣西巡撫苗徭猺獯獍梗化檄所屬廣建學塾刊孝經小學諸書使之誦習又自撰歌詞以勸戒之時晉豫大旱移撫河南割取俸餘萬二千金助振招流亡給籽種老穉無依者設廠收養強有力者任工作世與曾國荃振晉並稱云七年調湖南巡撫撫標兵譁變懲四人而事定及擢總督又有武漢教匪之亂捕誅數十人亦遂安堵言官先後糾彈事下彭玉麟坐才力竭蹶絀吏議無何御史陳啓泰劾宗瀛務封殖仍下玉麟按覆玉麟後白其誣時左宗棠督江南欲規復淮鹽減川引宗瀛以減川增淮關川省數十萬鹽丁運夫生計因抗疏力爭言按年減運則未運者將盡化爲私縱使湖北置兵徵循而巫峽流急鹽船下駛瞬息百里兵少力不能制多恐滋生事端且鄂饑無著下拂輿情上虧國帑辭愷切未幾稱疾乞休歸初宗瀛從廷棟講學爲刊遺集以理學稱家居十餘載以徐延旭獲譴追坐舉主下部察議二十年卒年八十三

黎培敬字簡堂湖南湘潭人咸豐十年進士選庶吉士授編修同治三年出督貴州學政阻寇弗能進迺從劉嶽昭借軍數十竟達貴陽時總督勞崇光巡撫張亮基不相協軍事益壞培敬上書言狀朝廷始獲聞邊事黔苗俶擾謳誦寂寥培敬曰士氣不伸人心所繇不靖也於是出入寇氛按試州縣雖危棘不緩期貴州士民始復知文教道黔西晤道員岑毓英與語知其諳戎事遂請以滇中軍屬之培敬秩滿以太常寺卿石贊清薦命權布政使其時寇患方亟賊酋潘名榮守龍里久不下培敬曰今附郭百里倉廩猶實不因以爲資若轉藉寇吾屬必爲所虜矣因說提督出城取龍里逾歲克之旋復貴定名榮遁去黔軍克捷自此始詔嘉之予實授繇是東定都勻北靖開修南平陳喬生西除林自清莅黔數載境內悉平光緒改元擢巡撫繼曾璧光後益嚴吏治以上疏請釋前總督賀長齡處分並予設建祠錫秩罷歸五年起四川按察使時丁寶楨督蜀課吏嚴培敬至寶楨出郊迎曰此吾貴州賢使君也培敬以巡撫降官絕無愠意孜孜治事寶楨數薦其賢六年擢漕運總督漕督雖閑職然膺仕培敬嘗

不以自污公費所餘以之修驛館建兵房增書院饗錢興釋奠禮器官煤利濟諸局亦庶續告成人無敢干以私七年授江蘇巡撫未上疾作遂告歸明年卒優詔賜卹諡文肅子貴陽清江浦建祠

崧駿字鎮青瓜爾佳氏滿洲鎮藍旗人咸豐八年舉人由兵部筆帖式累遷郎中同治六年出知廣東高州府以憂解服除起授山東沂州府歷廣西按察使直隸布政使漕運總督光緒十二年巡撫江蘇調浙江所至興利除弊以南糧改折色吏民交困並減旗營民糶織造匠糧令州縣糶價以供漕弊乃革十五年浙患水浸奏請免漕發帑振之而於京協諸餉仍從容籌解復集貲購米實倉儲杭嘉湖三府暨蘇松常太諸水源出於潛天目山附近苕溪南北二湖爲分洩地歲久淤塞用工賑法招集流民疏濬之其杭嘉湖紹諸塘岸堰牯靡不次第修治民賴其利十七年卒於官崧駿以清廉自矢於國計民生服念不忘撫江浙績尤著民請祠之得旨俞允子昆敬戶部郎中

崧蕃字錫侯崧駿弟也咸豐五年舉人初入貲爲吏部郎中光緒五年京察一

等簡四川鹽茶道屢署按察使保薦卓異十一年授湖南按察使遷四川布政使十七年擢貴州巡撫廣西寇陸亞滙煽亂西林與貴州接壤崧蕃遣將扼册亨要隘邊患遂平調雲南巡撫擢雲貴總督檢視防營缺額積弊劾副將雷家春並自請議處革職留任二十六年奏請陛見值拳匪肇亂命留京會辦城防事旋扈駕至太原飭還本任行次調陝甘總督於城南建立大學堂分兩齋東齋考文西齋講武而修濬甯夏七星渠尤爲民所利賴寧郡隄工創自乾隆時魚鹽之利甲通省後漸湮廢中衛縣令王樹枏素講求水利崧蕃檄令勘工自七星渠上接白馬通灘疏濬通深百八十餘里灌田六萬餘畝硤礪變爲沃壤逃亡復業又以渠水分自黃河勢洶湧春夏山水驟發與黃流渾合泥沙雜下旋濬旋塞乃倣古人暗洞激水法凡傍山之渠架油松成洞覆以石板山水流石上而渠水潛行洞中又度地勢築高隄導山水使入黃河並於渠口築進水退水兩壩使黃流曲折入渠不致冲漫工竣數經暴水卒不圯設農務局招墾荒地如平羅涇源諸縣先後報墾數百千畝舊有機器局漸次擴張凡興作實

事求是不惟其名三十一年調閩浙總督未上以疾卒追贈太子少保子外務部主事豫敬以員外郎補用

邊寶泉字潤民漢軍鑲紅旗人同治二年進士授編修十一年補浙江道監察御史大學士李鴻章總督直隸奏清苑麥秀兩歧寶泉疏論之曰祥瑞之說盛世不言臣來自田間麥有兩歧常所親見地氣偏厚偶然致此何足爲異漢章之時以嘉穀芝草改元章和何敵猶據經義而折宋由袁安至馬端臨文獻通考乃舉歷代祥瑞統曰物異夫祥且爲異今以無異之物而謂之祥可乎上年畿輔水災甚鉅訖今沒水田廬猶未盡出永定河甫經葺工北岸又潰邊軍未撤民困未蘇鴻章身膺重寄威望素隆當效何敵之公忠懲宋由袁安之導媚皇上御極之初庶吉士嚴辰散館考試曲意頌揚奉旨嚴飭今鴻章爲督撫大吏非草茅新進可比乃亦務爲粉飾於治道人心關繫尤鉅應請降旨訓飭是時鴻章又以永定河合龍奏獎工員勞動奏上而河復決寶泉又疏請撤銷保案鴻章新建大功寶泉再疏彈之鴻章亦不以爲忤天下兩賢之遷戶科給事

中先是都御史胡家玉疏陳丁漕積弊語侵巡撫劉坤一坤一覆奏家玉通賦未完且私書屬託公事實寶泉復劾坤一籍詞箝制地方長吏此端一開啟天下輕視朝廷之漸疏入坤一下部議處光緒三年出爲廣西督糧道再遷布政使九年擢陝西巡撫尙書閔敬銘議陝西收放糧米改徵折色寶泉持不可以謂穀數有定今改折色所收必有減於昔而民始樂從所放必加多於前而兵乃足用入不敷出一時強爲彌補後將何所取價昔歲大饑終賴道倉儲粟多所全活今並此而去之恐饑饉洊臻益無可恃上聽其議十二年調河南巡撫移疾歸二十年即家起閩浙總督閔鹽運課積八十餘萬前任奏報率皆飛瀝他項爲挹注寶泉至盡發其覆乃有停釐補課之奏船政舊設大臣後以總督兼之寶泉特疏請復故制且條上造船購料延教師籌經費四事而不私其權人嘉其廉讓二十四年卒於官贈太子少保

于蔭霖字次棠吉林伯都納廳人咸豐九年進士改庶吉士授編修從大學士倭仁問學光緒初俄羅斯讓還伊犁蔭霖疏勸崇厚擅許天山界地數百里及

崇厚被逮有爲之游說者復嚴疏劾之且劾樞臣畏愆欺罔六年授贊善累遷中允八年出爲湖北荆宜施道是秋淫雨漢水溢檄所屬開倉振濟又溶紫貝淵上游改闢爲壩疏支流洩積潦水患始息新荊州書院設經義治事兩齋生徒雲集講舍至不能容禽斬盜魁李人奴等餘黨屏息宜昌民教構訟法領事袒教民挾兵艦至蔭霖不爲動後卒無事英商漏宜昌關稅既覺乃納賕請免不許請補稅許之英商歎其廉十一年擢廣東按察使廣東素多盜至白晝劫掠衢市蔭霖言於總督張之洞奏請就地正法報可順德廩生簡明亮有學行緣事繫獄察其枉立出之十二年遷雲南布政使丁母憂服闋改授台灣布政使未行會弟編修鍾霖以前在籍與蔭霖同辦賑務爲姦商湯連魁誣控獲譴蔭霖具疏辨詔遣大臣即訊頗得連魁行賄狀然蔭霖猶坐是落職廢居京師二十年日本戰事起命往奉天襄依克唐阿軍請募兵二萬自效詔許募萬人分四軍與民團相應援明年和議成總督張之洞山東巡撫李秉衡交章論薦詔賞三品頂戴署安徽布政使至則清釐田賦杜絕欺隱增墾田萬八千餘畝

樽節庫儲至二百萬金二十三年德人索膠州灣又脅朝廷罷李秉衡蔭霖奮然曰是尙可爲國乎上疏極論王大臣不職因附陳修省五事不報二十四年擢湖北巡撫之洞爲總督頗主泰西新法蔭霖斷爭議以爲救時之計在正人心辨學術若用夷變夏恐異日之憂愈大之洞意迂之然仗其清正使治吏事湖北財賦倚釐金蔭霖精心綜核以舉劾爲激揚歲入驟增數十萬二十七年調撫河南時兩宮西狩德法兵日謀南下而河北莠民往往仇殺教民蔭霖檄彰衛懷道馮光元捕誅首惡數人德法兵至順德聞教案已結乃還二十八年調湖北會詔裁缺改廣西廷議蔭霖不善外交復降旨開缺假居南陽三十年卒蔭霖晚歲益潛心儒先性理書雖已貴服食不改儒素朱子書不離案側時皆稱之

饒應祺字子維湖北恩施人幼穎悟好學試作渾天儀旋轉合度年十二入邑庠益究心經世學咸豐九年粵寇石達開自湘鄂犯蜀道恩施應祺率鄉團助城守由候選訓導議敘國子監學正同治元年舉於鄉揀選知縣援例爲主事

分刑部父卒廬墓側服闋陝甘總督左宗棠檄參軍幕以克金積堡巴燕戎格諸處功擢知府光緒三年署同州知府時秦晉亢旱赤地千里飢民洶洶遮道不得前應祺諭之曰此來賑汝飢耳譁變者殺無赦乃捐俸錢爲官紳倡弛重糶禁旬日得糧七十餘萬石又截留他省糧運以助不繼復爲招流亡定墾章給牛種蠲雜稅歲稍轉教民興水利勤樹植設義倉行保甲又規復豐登書院創修府志文化蔚興士民爲立生祠左宗棠疏薦應祺守絕一塵才堪肆應請以道府簡補十年授甘州知府陝西自軍興兵差旁午設里局董之凡四十一廳州縣大困上命巡撫邊寶泉赴陝查辦疏留應祺理其事應祺量道路衝僻定收支之數分別兵流掃淨汰冗歲省數十萬兩是年冬抵甘州任賑飢勸學設織紡局孤嫠所革徵草之弊復七觔一束舊章十一年遷蘭州道漸行士民攀轅留行多泣下者旋署按察使嚴搶斃爲婚之禁禽督署差弁及鄉人楊營弁置之法手訂清理庶獄章程以詔羣吏視其功過而黜陟之十五年調新疆喀什噶爾道改鎮迪道兼按察使銜十七年署新疆布政使十九年實授新疆

兵燹後民物凋弊地多荒棄伊犁故腴壤回屯舊八千戶四不存一應祺建議伊犁將軍給新裁錫伯索倫兵牛糧使之屯種給新裁察哈爾厄魯特兵羊馬使牧放並招致關內災民按丁授地實行寓兵於農之法羅布淖爾者舊史所稱星宿海也漢爲且末尉犂婁諸國地東西廣千六百餘里南北袤千里或數百里自陽關道梗其地遂成歐脫應祺建議巡撫築蒲昌城設英格可力善後局卡克里克屯防局招徠漢回客糴通道置驛建堡濬渠教以耕織又請改防軍爲標營定額征糧石每年折色之法畫一錢法俄領事原議駐吐魯番後求移駐省垣將軍巡撫離之應祺謂此不必爭我所應爭者洋商稅則須與華商一律同時議定新省毘連英俄陸路進口地不一北道伊犁南道喀什應設關各以本道爲監督塔城烏什葉爾羌應設分卡歸各道兼轄均如議行南路初設領署應祺貽書伊塔喀什兩道曰交鄰之道莫先於自治我之用人行政使彼族聞而敬服則遇事不至以非禮相要此爲折衝禦侮第一要義飲食往還平時貴以情誼相聯至華洋訴訟必先得華民是非曲直實情而後與之爭

庶可關其口而奪之氣一詞稍僞彼將執以相例而全案皆虛矣情以需之理以盾之又其次也新疆向受協餉每苦歛絀應祺開源節流數年庫儲逾百萬二十一年河煌回煽亂蔓延甘涼諸郡其別股萬餘謀西竄上命應祺署新疆巡撫應祺檄提督牛允誠防安西玉門諸處拒寇境外回曾劉四伏果竄玉門之昌馬遇允誠軍戰數不利盡棄輜重踰雪山山西逸應祺遣參將李金良要之紅柳峽生禽劉四伏降其衆八千安置於羅布淖爾設軍鎮撫同時庫車回謀起事竄遠回亦以爭新教相仇殺洵洵思變應祺皆先期撲滅故四伏無內應卒就殲上嘉其功實授巡撫應祺以新疆僻處國西北隅密邇強俄士卒衆而器械窳生齒繁而司牧少不足以固吾圉乃購快槍萬枝於德國而設機器廠製造子彈奏設左右翼馬隊爲游擊師又開辦於闐塔城金礦墾荒田開渠井廣興實業凡有利於民生者皆次第舉自是地利盡闢兵備有資較初建行省時迥異矣拳匪亂起俄兵自薩馬進逼邊卡應祺會總督魏光燾伊犁將軍長庚仿東南各省與各領事結互相保護之約俄兵乃退講成應祺應詔陳言略

謂古今中外治法務在求實舊章非無可守守之不以實成法亦具文新法非不可行行之不以實良法亦虛飾心之實不實宜於行事之實不實驗之逾年設詔武備學堂編立常備續備巡警各軍應祺主操練用新法器械用新式人惟求舊必樸實勤奮久於戰陣者方可入選上疏極論之並謂中國習洋操三十年一敗於日本再敗於聯軍爲務虛名而貽實禍之證所言皆切中時弊而尤斷斷於界約不少遷就帕米爾高原國境也有高宗御製平寇碑立於蘇滿英俄交覲其地而俄人先竊據之應祺官布政使時商之巡撫以理退俄兵遣軍戍焉俄人悔失計日聒於總署要我撤兵應祺持不可謂我自守門戶其理直我退則英必至英來則俄又必爭是息事而益多事也後竟如應祺言坎人求租種沙車屬喇斯庫穆荒地應祺謂坎本我屬宜示懷柔其在玉河卡倫外者可允其租墾納賦比於華人其在玉河東北屬邊內者宜卻之防後患總署與英使議界約以坎部讓與印度而塔墩巴什帕米爾及喇斯庫穆全境皆讓與中國應祺抗言喇本我地不得謂之讓而俄人轉謂中國以喇地讓與英人

利益宜均以兵威相脅應祇飭屬嚴備邊而以議租原委及議約界限詳論之
俄人始無辭應祇官西疆久闕地安民屢請建官設治以資鎮撫二十八年復
疏言新疆自光緒四年改建行省土地日闢戶口日繁原設州縣轄境遼遠非
增設府廳不足治理西四城喀什噶爾道疏勒州爲極邊重要請升爲府距府
百八十里之排素巴特地屬唐伽師城改爲伽師縣莎車地廣而腴英商屬集
請升爲府府南爲澤勒普善河增設澤普縣府西南色勒庫爾爲古藩鞏國實
坎巨提出入要路又與英俄接壤請設藩鞏分防通判距于閩縣四百里之洛
浦莊增設洛浦縣嗎喇巴什廳爲古巴爾楚地改爲巴楚州東四城阿克蘇道
溫宿州爲南疆要衝請升爲府舊城巡檢升爲溫宿縣距縣四百八十里之柯
爾坪增設柯坪縣丞焉耆府南六百三十里布告爾分防巡檢爲古之輪台請
分設輪台縣卡克里克縣丞其地爲古塔羗國改設塔羗縣庫車廳土地廣沃
請改爲州州南沙爾雅增設沙雅縣北路阜康縣之濟木薩縣丞富庶逾於縣
舊驛名孚遠升爲孚遠縣距吐魯二百四十里之闕展巡檢地爲古鄯善國升

爲鄆善縣昌吉縣所屬之呼圖壁巡檢向收錢糧請改爲縣丞計升設府三改直隸州二增通判一縣九縣丞二又奏增設鄉試中額二名會試中額一名暨各府學官學額先後皆議行是年調安徽巡撫行抵哈密病卒賜卹如例

俾祖翼字叔謀江蘇湖陽人同治三年舉人以知縣累至道員再攝武昌道教匪王覺一約期起事祖翼時筦營務乘夜率親兵掩捕之總督涂宗瀛疏保祖翼有濟變才光緒十五年授督糧道調漢黃德道兼江漢關監督以襄河漲發易壞舟創設襄樊報水電樹牌鳴鉦各船備禦水至遂無患督按察使擢浙江布政使祖翼以州縣徵糧照舊折價近年錢貴銀賤民力不支乃重定銀價設櫃徵收不得假手書役人稱其惠尤盡心水利於嘉興開泖河疏港建閘以資蓄洩於杭州浚上塘河臨平喬司等處農田三十餘萬畝皆獲灌溉之利上虞南塘舊以土築水至輒決采衆議改建石塘千一百丈始免水患二十六年北京拳亂報至祖翼獨起抑阻匪陷江山常山衢民復毀教戕官英國欲以兵艦赴浙祖翼亟遣員馳往鎮撫獲眞犯抵償潛消兵衅會兩江湖廣總督與各國

訂約保護南疆電詢浙省巡撫劉樹棠方臥病祖翼即逕電以浙省附約人心以安旋擢巡撫以浙省防練各營積弊疏請整飭略言浙省水陸防練各營數逾制兵陸續添募餉實不敷而統領各營哨不顧操練緝捕爲何事汲汲焉唯浮冒剋減食弊自肥術愈出而愈奇勇日雜而日弱盜日防而日多今將盪滌宿垢而作新之立法自上責在督撫臣任事卽通飭各營與之更始以後如有貧劣將弁仍敢浮冒剋減決不姑容擬先勦其廉恥而兼課其材武一面飭州縣查保甲辦團練以輔制兵之不逮一而遴委廉幹道府酌帶哨勇分往浙東西抽點名糧認真校閱遇有大股盜匪督率營縣搜拿務絕根株總期合散爲衆化惰爲勤堪備一日之緩急雖然營衛小疾疏解足矣受病既深斷非猛劑不治天下之病無一不根於利統領營哨聞見已慣謂夫督撫所能操以繩其下者撤之而已參之而已撤之則又顧而之他參之則已飽颺而去且未幾而又資緣開復矣未幾而以將才調用矣惟督以岐法務去泰甚庶有以振暮氣而戢貪風或震於各國一時之強幾謂全恃火器不知其本原仍在臨財廉與

士卒同甘苦否則未戰先潰火器徒以齎寇直自伐耳可否請旨飭下兵刑各部采臣治亂用重之議嗣遇將弁職證確鑿者分別輕重嚴定參革追繳倍將斬絞之例庶軍心一振於時局或有裨益疏入詔飭各省著爲令未幾丁母憂歸卒卹如例浙人請立祠祀之

論曰疆吏當承平時民生吏治要在因地制宜而已日昌寶第皆以尙嚴著績效宗瀛蔭霖飾之以儒術亦後先稱治培敬有爲有守崧駿兄弟所至盡職實泉勸清操祖翼能濟變並有可稱至應祺官關隴新疆垂四十年邊地初闢治蹟爛然實心實政其勞亦不可沒云

清史稿

列傳二百三十六

錫良

周馥

陸元鼎

張曾敫

楊士驥

馮煦

錫良字清弼巴岳特氏蒙古鎮藍旗人同治十三年進士用山西知縣歷任州縣有惠政光緒初晉大旱錫良歷辦振務戶必清查款必實放民皆德之二十一年山東巡撫李秉衡奏調補沂州知府擢兗沂曹濟道抵任值單縣大刀會滋事亟率隊往張示諭衆祇擒首要搜獲盟單當衆焚之匪黨咸畏皆散調山西冀甯道晉按察使調湖南擢布政使二十六年拳亂召禍京師危急錫良以湖廣總督湖北湖南巡撫會委統率鄂湘軍隊入衛迎駕山西立授巡撫時和議未定洋兵闖入晉邊錫良念兩宮幸陝和局固應兼顧而保晉衛秦亦不容忽乃通令各軍嚴行防守別遣委員出境犒師相機因應幸保無事和約定曾始弛防調湖北巡撫復開缺旋授河南河道總督以事簡奏請裁歸巡撫兼理詔

允行調補河南巡撫兼管河工豫省吏治久隳劾去道府以次數十人政紀肅然泌陽教案事起立派兵馳捕首犯被擾難民無分民教一律撫恤調熱河都統熱河本就蒙地設治向沿舊習不講吏事尤患多盜錫良首請改制設立求治局綜理吏治財政開辦圍場荒地以興墾務整飭巡防專意緝捕匪風始戢又以熱境地廣官少奏請升朝陽縣爲府並增設阜新建平隆化三縣熱河自此始有吏治二十九年擢閩浙總督調署四川時方議借外款修川路錫良力主自辦集紳會議奏設專局招商股籌公股復就通省田租歲抽百分之三名爲租股數年積至千萬以上股欸之多爲中國自辦鐵路最二十九年廷議整飭藏事藏人疑懼駐藏幫辦鳳全被戕錫良飛檄提督馬維騏督兵進剿並令建昌道趙爾豐率師繼進遂克巴塘仍飭爾豐進討裏塘裏屬桑披寺築礮謀抗拒爾豐以長圍困守六閱月斷其汲道始克攻破桑寺既平諸番懾服於是自打箭爐以外直至察木多巴裏鄉城德格等處均改縣治擴地至數千餘里且興墾開礦設學廣教番人漸知向化矣三十三年調雲貴總督滇省軍政久

廢器械尤缺乃創練陸軍設講武堂添購槍炮舊有防營一律改編自是滇省始有新軍滇多煙產土稅爲收入大宗錫良毅然奏請禁種各省煙禁之嚴唯滇爲最滇南連越越匪竄入河口戕官擾境立飭出隊分路截勦數日而定滇西土司以數十計日漸恣橫宣慰使刁安仁曾遊東洋外人稱以王爵尤驕妄聞有改土歸流之議輒思奮動錫良先派員詢察曉以利害並令應襲各土司迅辦承襲以安其心刁安仁聞而畏感遣其弟至痛哭自陳改悔邊境得以無事宣統元年授欽差大臣調東三省總督東省自日俄戰罷俄佔北邊日踞南境局勢日危錫良蒞任即疏陳東三省逼邇京畿關係大局遼東租借之約十三年即滿期請朝廷主持上下一心以天下全力赴之以贖回遼東半島爲歸否則枝枝節節爲之恐其不能及也疏入不省錫良又以東三省兩隣分據非修大支幹路不足以貫串脈絡因擬修錦州至琿琿鐵路顧須橫貫南滿東清必非日俄所願尤非密借強國外款不能取均勢而策進行適美國財團代表遊歷來奉遂與密訂借款包修草約三日議定電奏請旨速正式簽定即日俄

再爭已落後着乃部議梗緩復機事不密事竟報罷及日俄協約東事益急錫良以救亡興政均非款莫辦再請商借二千萬兩以千萬設銀行其餘半以移民興墾半以開礦築路仍不省錫良慮東省危急情形朝廷尙未深悉乃請入覲面陳時醇親王監國攝政籌備立憲廷議方注重集權錫良先疏請實行憲法歷陳立憲精神在貴賤上下胥受治於法律先革其自私自利之心若敷衍培克似是而非財力凋敝人心渙漓九年立憲終恐爲波斯之續又以近年重臣親貴出洋考察徒飾觀聽見輕外人疏請停派並慎選親貴實行留學再疏諫中央集權以爲朝廷分寄事權於督撫猶督撫分寄事權於州縣無州縣即督撫不能治一省如必欲以數部臣之心思才力統治二十二行省則疆吏咸爲贅旒風氣所趨軍民解體設有緩急中央既耳目不及外省則呼應不靈爲患實大均不報至是入都而陳監國語尤切直不省如故告罷又不允其時朝鮮爲日併錫良以事勢益迫欲固民心先厚民力當以防匪爲名設立清鄉局籌備預備巡警部以兵法實即民兵奉人慮患思痛爭先應募期年得數萬人

全省皆兵未幾防疫事起疫起俄境沿東清鐵路逐處傳染未浹旬蔓延奉吉黑三省俄日羣思干涉錫良以防疫純屬內政嚴起防治三月而疫絕十一國醫士來奉考察開萬國鼠疫研究會於省署錫良主議咸起頌之錫良督東嚴吏治肅軍制清理財政整頓鹽務籌辦八旂生計頗著成績唯目睹內憂外患日危一日顧所以爲東邊計者既多未如志而朝政日非民心日去又無以挽救屢稱病乞罷三年始允解任調理武昌變作召入覲廷議本以錫良赴山陝督師並請獨領一軍衛京畿顧有人譏之乃改授熱河都統力疾赴任遜位詔下以病勢難支乞罷允之臥病六年堅拒醫藥卒年六十有六諡文誠錫良性清剛自官牧令即挺立無所倚嫉惡嚴所莅止遇不職官吏劾治不少恤非義之財一介不取於權貴尤一無饋遺故遇事動相牽制云

周馥字玉山安徽建德人初侍李鴻章司文牘累保道員光緒三年署永定河道初天津頻患水馥迭治津沽入海金鐘河北運筐港減河及通州潮白河設文武汛官資防守並言天津爲九河故道不洩則水患莫瘳請就上游開減河

而開屯田南運下游分水勢部議格不行後提督周盛傳開興濟減河屯田小站實本馥議丁艱服除署津海關道朝鮮初通商馥與美提督薛斐爾議草商約保衛之首稱朝鮮爲中國屬邦固以防侵奪也而樞府削之馥私歎曰分義不著禍始此矣九年兼署天津兵備道俄真除津海關道中法事起鴻章命赴海口編民船立國防鴻章之督畿輔也先後垂三十年創立海軍自東三省山東諸要塞皆屬焉用西法製造械器輪電路礦萬端並舉尤加意海陸軍學校北洋新政稱盛一時馥贊畫爲多醇親王校閱海軍嘉其勞擢按察使再署布政使築永定河北岸石堤衛京師蘆溝南減水石壩工尤鉅自是河不溢中日開釁馥任前敵營務處跋涉安東遼陽摩天嶺之間調護諸將收集散亡糧以不匱和議成乃自免歸鴻章疏薦之授四川布政使至則課吏績廣銀幣積糧儲虛教案易生釁撰安輯民教示頒郡縣未幾拳亂作八國聯兵內犯鴻章爲議和大臣總督直隸馥亦調直隸布政使先隨鴻章入都理京畿教案數月事稍定始赴保定受布政使印先是法兵至保定戕前布政使廷雍遂踞司署及

聞馥來列隊郊迎入署久之觀其設施無閒言乃徐引去鴻章卒遂護直督俄
擢山東巡撫詔留議津榆路事時和議雖成外國兵壁天津踞津榆鐵道設都
統治民政屢爭莫能得至是馥竟以片言解之馥撫山東值河決利津薄莊讓
徙民居不塞薄莊俾河流直瀉抵海沿河設電局備石工訖十餘年河不爲災
德踞膠州灣築鐵道達省治因佔路側礦山馥奏開濟南周村商埠相箱制德
人意沮自撤膠濟路兵還五礦馥既膺疆寄則益欲大有爲凡所以阜民財淪
民智者次第興舉天子嘉之擢署兩江總督移督兩廣三十三年請告歸越十
四年卒諡愨慎直隸山東江南士民皆祠祀之

陸元鼎字春江浙江仁和人同治十三年進士以知縣即用分山西改江蘇光
緒二年權知山陽有姦豪民交通胥役略人口行鬻捕輒先遁元鼎黎明起盛
儀從謁客中道折至民家破門入縛治其姦取出所略女婦數十人各放歸驢
聲雷動補江寧以髮歸服除坐補原缺調上海法蘭西人擊殺縣人沈兆龍傷
隱不見法領事不承擊殺元鼎曰時計表墜地有鋼條內斷而磁面未損者與

此何以異領事語塞如臬焚教堂檄元鼎往視教士聲言議不諧當以兵戎見元鼎曰如臬非軍艦所能至也不爲動抗議十餘日乃定價銀四千無他求是時江南北焚教堂十餘所次第定議悉視如臬移知泰州城河久淤熱歲旱民苦無水元鼎濬治之又移徙市廛迫河濟者雖巨室無所徇下河斜豎港故有隄在泰州境者六十里入東臺境隄庫水至勿能禦元鼎增高至十丈廣如之而豐其下以信工竟按察使檄東臺治隄與泰州接元鼎又助工十有一里自是兩境無水患尋調上元援例以道員候選兩江總督劉坤一疏薦元鼎才任方面二十一年授惠潮嘉道調江蘇糧道濠按察使陞見溫語移時論及前歲日本構戰我軍槍彈多與口徑不合以故敗帝因諭樞臣戒督撫審軍實且曰毋謂語由元鼎使督撫生芥蒂也江陰焚教堂縣吏捕首事者上之按察上海領事謂逮捕者非首犯駐京公使言於總督令領事往會鞠元鼎曰會鞠有專官按察使署非會鞠所領事言不會鞠當觀讞也元鼎持不可領事曰其如總署指揮何元鼎曰慎守國憲官可辭法不可撓領事怏怏去樞臣聞而嘉之曰

不爾又爲故事矣尋署布政使護巡撫二十九年邊清連總督調湖南巡撫時方在告廣西匪起窺湖南貴州匪逼靖州元鼎力疾赴官籌邊防與總督張之洞會奏以堵爲防不如以助剿爲防於是募勇令提督劉光才防西路令衛永道莊廣良入貴州而道員黃忠浩佐之廣良攻下龍貫峒忠浩亦大敗悍賊於同樂又令提督張慶雲助擊廣西四十八峒亂徐定朝命雲南布政使劉春霖移湖南率所部滇軍助湘防元鼎言滇軍不可用已而後營果叛體陵會匪謀叛事洩自承革命語連日本留學生元鼎誅二人囚一人他無所株連人心大定徵兵之議起也元鼎已調撫江蘇上言南人柔脆其應徵者多市井無籍不勝兵當專選江北淮徐諸府不當限區域部議格不行其後逃亡相屬如元鼎言二十九年京察開缺另簡明年召入京奏對語及江浙爭滬杭鐵道事元鼎力言士民忠愛無他心上爲動容命以三品京堂候補佐辦資政院事俄乞歸宣統二年卒於家

張曾敷字小帆直隸南皮人同治七年進士以編修出知湖南永順府地屬苗

疆域難治斥貨募勇戢盜悉寘之法吏之尤貪汚者彈劾之徒知廣東肇慶府有惠愛督撫交章論薦光緒二十年除福建鹽法道岡鹽踊貴私運鑿起爲嚴立規約奏免全釐以恤商而正課亦饒遷按察使歲餘病免越三年再起召見奏對稱旨皇太后獎其明慎即日授四川按察使未到官遷福建布政使調廣西桂故瘠區又分任庚子賠款益不支曾啟改釐章嚴比較裁冗費罷不急官吏用以不紕二十九年拜山西巡撫日俄衅作日軍進駐遼南曾啟建議闢要地爲商埠別與日本密訂協守同盟之約聲明不干內治所慮者俄爲日敗必將取償於我伊犁隣近藩封亦漸外嚮故亟宜籌餼練兵有備無患而庫張鐵路可緩辦以伐其謀言頗扼要馬賊劉天祐等擾後套曾啟調集各軍討平之三十二年調撫浙江時浙西鹽梟煽熾嘉湖統將吳家玉陰與梟通都司范榮華尤不法曾啟便道之官或勸以兵從曰是速之叛也遂輕騎巡嘉郡召家玉入謁諭以禍福家玉不敢動徐檄他將領其衆而羈之甬東倭榮華等梟漸斂迹浙路交涉久未決草約逾定期英領事猶堅執之曾啟據約立爭事乃定三

十三年頒下法律大臣沈家本試行訴訟法曾敷言中國禮教功用遠在法律上是以尊親之義載於禮經漢儒說論語亦謂綱常爲在所因此各省所同浙不能異者也浙西梟匪出涉浙東寇盜潛滋治亂國用重典猶懼不勝驟改從輕何以爲治此他省或可行而浙獨難行者也於是逐條駁議之是年秋瑾案起秋瑾者浙江女生言革命者也留學日本歸爲紹興大通學校教師陰謀亂曾敷遣兵至校捕之得其左驗論重辟黨人大譁調撫江蘇俄調山西稱疾歸家居十四年卒年七十九

楊士驤字蓮府安徽泗州人光緒十二年進士選庶吉士授編修保道員補直隸通永道擢按察使遷江西布政使復調直隸三十一年署山東巡撫河貫東省千餘里淤高而堤薄歲漫決爲巨害士驤以爲河所以歲決者河工員吏利興修又因以遷擢也乃定章程歲安瀾官奏敘弁兵支款如例河決官嚴參不得留工効力弁兵依律論斬身巡河堤厲賞罰自是數年山東無河患曹州多盜行清鄉法嚴督捕德兵違約屯膠高久不撤數月盜少戢會各國撤京津兵

士驥與德官議遂盡撤駐路德兵三十三年代袁世凱爲直隸總督世凱爲政首練軍籌款尤多興革務樹威信北洋大臣遂爲中外所屬目士驥承其後一切奉行罔有違財政日竭難乎爲繼而周旋因應常若有餘時頗稱之明年入覲時議修永定河士驥閱河工疏言全河受病一由下口高仰宣洩不暢一由減壩失修分消無路蘆溝橋以下舊有減壩年久淤閉宜折修并挑減河因請撥帑四十六萬餘兩詔下部議宣統元年德宗梓宮奉移西陵詔所需不得攤派民間士驥慨然思革百年之弊疏曰國初因明季加派紛繁民生彫敝屢降旨申禁科累近畿繁劇供億多不能盡革故田賦較各省輕而歲出差徭逾於糧銀之數新政迭興學堂巡警諸費無不取給於民諭納之艱日以加其擬官紳合查常年應官差徭實係公用者酌定數目折交州縣自辦不得濫派折錢胥役書差官給津貼庶積弊一清上下交益疏入優詔答之五月卒贈太子少保諡文敬士驥少孤落起家幕僚至於專閫與人無迕衆皆稱其通敏云

馮煦字夢華江蘇金壇人光緒十二年一甲三名進士授編修登疏代奏請

圖自強敦大本行實政德宗嘉納典湖南鄉試稱得士二十一年以京察一等授安徽鳳陽知府鳳屬連年水澇煦單騎按部逐一履勘以被災之重輕定給振之多寡人霑實惠並屢平反疑獄總督劉坤一以心存利濟政切先勞疏保兩攝鳳穎六泗道二十七年遷山西按察使調四川廣安州有聚衆謀毀學堂者獲四人擬照土匪例正法煦白大府請按而後誅以去就爭至免冠抵几不得請不止旋署布政使復調安徽兼署提學使三十三年擢巡撫時國是日非海內外黨人昌言革命巡撫恩銘被刺衆情惶惑煦繼任處以鎮靜治其獄不株連一人主散脅從示寬大人始安復疏言今者黨禍已亟民生不聊中外大臣不思引咎自責合力圖強乃粉飾因循苟安旦夕貽悞將來大局阽危日甚一日挽救之方唯以覈名實明賞罰爲第一義而其要則在民爲邦本一言有尊主庇民之臣川之勿疑有誤國殃民之臣刑之毋赦政府能使天下自治則天下莫能亂政府能使天下舉安則天下莫能危根本大計實係於此疏入大臣權倖多忌嫉之明年遂罷宣統二年江皖大水復起爲查振大臣出入災

區規定辦法施及豫東未一年凡振三十九州縣放款至三百餘萬後復立義
振會連年水旱兼有兵災遠而推至京直魯豫湘浙無歲不災無災不振蓋自
涖官訖致仕逮於邈老與荒政相終始衆稱善人聞國變痛哭失聲越十有五
年卒年八十五煦居官廉而好施平素講學以有恥爲的重躬行實踐文章爾
雅晚境至鬻文自給云

論曰光緒初督撫權重及其末年中央集權復多設法令以牽制之吏治不可
言矣錫良彊直負重安內攘外頗有建樹馥諸練士驥通敏元鼎辦交涉曾啟
論法律並能持正煦善治振與荒政相終始民爲邦本善哉言乎錫良初疏諫
集權樞廷轉相箝制及事變起大勢所趨皆一如所言世尤服其先見云

清史稿

列傳二百三十

李鶴年

文彬

任道鎔

許振禕

吳大澂

李鶴年字子和奉天義州人道光二十五年進士由編修改御史轉給事中父憂歸服除命赴河南襄辦軍務同治元年授常鎮通海道署河南按察使調直隸授布政使四年擢湖北巡撫調河南時捻匪由山東南竄鶴年以爲十餘年來賊屢擾歸陳南汝間即去而他竄必假道於豫乃增募兩軍各萬餘人一日毅軍宋慶統之一曰嵩武軍張曜統之更以馬隊屬善慶與兩軍爲犄角於是宋慶等軍大破張總愚睢州鶴年親赴陳留杞督戰任賴各逆復乘虛北擾鶴年以賊蹤無定防河尤急賊果犯中牟以有備不得逞乃於省治西決隄引水南流擾及長垣鶴年飛檄水陸各軍沿隄剿堵賊西走湖北麻城黃岡詔飭宋慶一軍越境會剿殲賊無算鶴年自駐許州策應賊竄裕州慶擊敗之善慶及

淮軍劉銘傳大敗賊賴楡任柱被戕死賜鶴年頭品頂戴七年奉命督師出境馳抵磁州捻犯近畿更由滑濬等處沿河東趨坐防堵不力再議處豫軍告捷賞還頂戴總愚溺死捻匪平照一等軍功議敘十年擢閩浙總督明年陞見賜紫禁城騎馬旋署福州將軍兼署巡撫詔詢海防事宜覆奏言海防之策莫重於練兵籌餉製器用人四端四者之中以用人爲急務而尤在專其責成沿海疆臣固責無旁貸第無統率大員仍恐意見紛歧臨事推諉上韙其議光緒元年調河東河道總督兼署河南巡撫七年授河南巡撫仍兼河督十年坐審辦盜犯胡體安連疏抗辨部議革職以祝嘏恩賞降二級職銜十三年署河督疏言黃河分流自宋時河決澶州分爲二派明築黃陵岡始合爲一河性上漫則下淤今兩路皆淤急宜疏支河以預籌宣洩報可逾年鄭工復決發軍臺效力未幾釋歸並賞三品銜十六年卒宣統元年開復原官鶴年有知人鑒少與文祥同學相淬厲及居言職駁疏劾肅順跋扈而奏起曾國藩於家謂必能辦賊拔宋慶張曜統豫軍後皆爲名將治豫久多善政豫人刻石頌之始任河督黑

岡隄潰不絕如縷鶴年親督工二十餘晝夜險工克濟德宗嘗詢李鴻藻以善治河者鴻藻舉鶴年上亦識前事之枉也故再任河督其卒也豫民有流涕者三子葆恂博學多文尤知名

文彬字質夫納喇氏內務府滿洲正白旗人咸豐二年進士授戶部主事十年以員外郎隨扈幸熱河明年遷郎中出知山東沂州府捻匪逼府城會師攻拔賊巢禽匪首孫化詳等敘功以道員用同治四年隨布政使丁寶楨敗賊滕縣臨城驛更繞赴東平防賊北竄補充沂曹濟道擢按察使收復海豐擢布政使十年署巡撫補漕運總督再署巡撫旋還任光緒五年督漕北上因請陛見並與河督李鶴年巡撫周恆祺會商運河事宜通籌河道寬深改設運口導引衛河設立隄壩繪具圖說以進略謂現時北運口在張秋南八里廟與南運口斜對相距二十餘里黃流至此雖收束而溜勢散漫歧汊甚多大抵溜勢近南則北口淤墊近北則南口淺阻故漕船出南運口入黃後必東北行二十里至黃溜匯一之史家橋再南行二十里至八里廟北運口汛水大漲方能入運今擬

移北運口於史家橋北六里黃河西岸由阿城橋東隄開河一道至陶長堡爲
出黃入運口門築壩灌塘則黃水不至奪溜可免牽挽之難黃運之間自賈工
合龍後每伏秋大雨水無所洩民間低地有積水數年不得耕種者若將陂水
引歸一塘不惟蓄水濟運又可涸復民田運口既定即可導引衛河自直隸元
城集東三里衛河曲處鑿新河一道經直隸之南樂山東之朝城至張秋南之
蕭口涵洞入運計衛高于運九丈餘長百五十餘里導以濟運勢如建瓴更有
大小二丹水亦可由衛濟運凡建四橋二壩及挑河築隄估銀七十六萬較之
借黃濟運旋挑旋淤者相去遠矣又嘗借兩江總督吳元炳奏復淮流故道略
謂淮水匯四十餘河淤於洪澤湖楊莊以下雲梯關爲入海故道餘波入運濟
漕遇旱復蓄淮流由運河分入淮揚各橋洞以溉民田自洪澤湖不能蓄水張
福引河又不通暢每遇盛漲運河一綫東隄其勢岌岌儼竟衝溢不至以裏下
河爲壑不止論者謂必設法束水然與其上游議堵何如下游深通因條上疏
濬楊莊以下舊河入海故道未幾卒有詔褒錫兩江總督劉坤一以文彬遺愛

在民請建專祠清江浦允之子延煜舉人四川鹽茶道延熙舉人九江知府延燮進士武昌知縣延照舉人禮部員外郎

任道鎔字筱沅江蘇宜興人拔貢考授教職咸豐中在籍襄辦團練除奉賢訓導以籌餉勞晉秩知縣銓當陽多善政調江夏同治二年擢知順德府畿南匪起行堅壁清野法修治城堡屢擊賊於沙河平鄉間會捻衆北犯道鎔率練勇守沙河夜與賊遇揮衆奮擊矛傷及身不退賊徐引去晉秩道員洛河自廣平入久淤塞道鎔與鄰郡合濬又濬郡北響水河復民田萬餘頃總督曾國藩李鴻章迭薦之十一年調保定尋擢開歸陳許道別河工積弊驗工料必以實嘗冒風雨搶護中河險工四晝夜始定光緒元年署按察使授江西按察使省獄羈囚四百餘人道鎔便宜訊決三月而清四年遷浙江布政使調直隸直隸自軍興州縣報銷未清又數值謁陵大差交代糾葛道鎔分別新舊案定限清結裁革州縣攤捐實發養廉銀以郵吏勸屬縣積穀備荒七年擢山東巡撫疏陳營務廢弛易置統將以緣管額餼練新軍責郡縣勸緝捕泰山沂水之間驛路

崎嶇發卒開治平坦行旅便之旋以保獎已革知府潘駿羣被議又以失察編修林國柱預報起復被劾職降道員家居久之二十一年起河道總督故事河督開封濟甯並設行署自咸豐時常駐開封山東河事由巡撫專治至是復改議河督駐濟甯而河南巡撫兼治河道鎔言官吏不相屬則令難行不如仍舊便報可時河患多在下游河督專司上游事簡道鎔務節費歲以餘帑還司庫二十六年拳匪起河南姦民乘機煽亂道鎔處以鎮靜練河標三營助省防次年調浙江巡撫承國威新挫後民教相鬩案多未結持平訊決之籌集債款衝其緩急民不重困二十八年乞病歸逾三年卒於家年八十三

許振禕字仙屏江西奉新人咸豐初以拔貢生參曾國藩戎幕追楚軍困於江西都邑相繼陷振禕偕內閣中書鄧輔翰募鄉兵擊賊進賢東鄉旋復吉安敘功以同知銓選同治二年成進士授職編修出督陝甘學政時河州降回復叛而西甯諸郡回漢民亦日相仇殺試事久停不舉振禕始按試各郡多錄降人子弟補行八次歲科試入學者數千人回民大服建味經書院於涇陽廣置書

籍以化其獷俗又請陝甘分闈鄉試各設學政允之總督左宗棠以謂邊氓長治久安之效胥基於此父憂歸光緒二年起故官八年授彰甯懷道減屬縣差徭費歲二十餘萬豫修裏河隄防淮海各鹽區得免水患十六年擢河東河道總督築榮澤大壩胡家屯米童寨各石壩河賴以無患其要尤在嚴稽察不私財權令七廳徑赴司庫支領故積弊除而工堅十一年遷廣東巡撫禁賭闈姓粵民利賴之二十四年裁廣東雲南湖北三巡撫缺振禱調內用乞假歸逾年卒附祀江蘇河南曾國藩祠

吳大澂字清卿江蘇吳縣人同治元年秋彗星見西北詔求直言大澂方爲諸生入都應京兆試上書言致治之本在興儉舉廉不言理財而財自裕若專務剖克罔恤民艱其國必敝後六年成進士授編修穆宗大婚典禮隆縟疏請裁減繁費直聲震朝右出爲陝甘學政奏以倉頡列祀典允之又薦諸生賀瑞麟楊樹椿篤志正學給瑞麟國子監學正銜樹椿翰林院待詔銜士風爲之一變時詔修頤和園大澂復言時事艱難請停止工作疏入留中光緒三年山陝大

饑奉命襄辦賑務躬履災區查勘全活甚衆左宗棠曾國荃李鴻章等交章論薦四年授河北道時比歲荐饑貧民減價鬻田十不得一巡撫涂宗瀛飭荒歲賤價之田准取贖然往往爲勢家所持以故失業者衆惟大澂能判決如巡撫愷六年詔給三品卿銜隨吉林將軍銘安辦理西北邊防大澂周歷要隘始知琿春黑頂子地久爲俄人侵占因請頒舊界圖將定期與俄官抗議未得旨時有韓效忠者登州人傭於復州侯氏負博進通往吉林夾皮溝地產金在甯古塔三姓東萬山環繞廣袤七八百里流冗嘯聚其中亡慮四五萬咸受效忠約束效忠嚴而不擾衆服其公允屢抗大軍不出大澂單騎抵其巢留宿三日勸效忠出效忠猶豫意難之大澂曰我不疑若若乃疑我耶對曰非敢疑公某負罪久萬一主兵者執前事爲罪某死不恨辜公意奈何大澂挺以自任遂與效忠出奏給五品頂戴子七品孫登舉有平寇功授參將七年授太僕寺卿法越事起會辦北洋軍務駐防樂亭昌黎十年遷左副都御史俄命使朝鮮定其內亂鹽運使續昌副之至則日本使臣井上馨避不肯見而挾朝鮮左議政金宏

集於議政院索償兵費三十萬大激謂續昌曰是蔑我也立率兵至議政院排
闖入責數宏集柄國敗壞國事今定約稍不慎便滋異日紛非所以靖國也宏
集唯唯井上馨亦氣懾減索兵費十一萬而去十一年詔赴吉林會同副都統
伊克唐阿與俄使勘侵界即所侵琿春黑頂子地也遂授咸豐十一年舊界圖
立碑五座建銅柱自篆銘曰疆域有表國有維此柱可立不可移於是侵界復
歸中國而船之出入圖們江者亦卒以通航無阻十二年擢廣東巡撫葡萄牙
侵界至澳門香山總署與立約通商畫澳門歸葡轄大激持不可條上駁議不
報十四年鄭州河再決上震怒褫河督李鶴年職以大激代之是年冬河工合
龍大激力居多激盛負時譽會海軍議起以醇親王奕譞爲總理大激素與
王善治河功成實授河道總督加頭品頂戴大激遂疏請尊崇醇親王稱號禮
節疏入孝欽顯皇后震怒出醇親王元年所上預杜妄論疏頒示天下大激幾
得嚴譴以母喪歸乃已十八年授湖南巡撫朝鮮東學黨之亂也日本與中國
開釁朝議皆主戰大激因自請率湘軍赴前敵優詔允之二十一年出關會諸

軍規復海城而日本由間道取牛莊魏光燾往禦戰不利李光久馳救之亦敗僅以數騎免大激憤湘軍盡覆拔劍欲自裁王同愈在側格阻之同愈以編修參大激軍事也光燾請申軍法大激歎曰余實不能軍當自請嚴議退入關奉革職留任之旨乃還湖南尋命開缺二十四年復降旨革職永不敘用二十八年卒年六十大激善篆籀能官後貧甚售書畫古銅器自給著有古籀補古玉圖攷權衡度量攷恆軒古金錄齋齋詩文集

論曰河患日棘而河臣但歲慶安瀾即爲奇績久未聞統全局而防永患求治難矣鶴年以善治河稱文彬論治河改運口復淮流亦頗有識道鎔別河工積弊務節減振禱督工嚴盡革中飽尤以勤廉著皆足收一時之效然徒治標非治本計也大激治河有名而好言兵才氣自喜卒以虛僞敗惜哉

清史稿

列傳二百三十八

李朝儀

段起

丁壽昌

曾紀鳳

曾紀鳳

鐵珊

桂中行

劉含芳

游智開

李用清

李金鏞

金福曾

童兆蓉

李朝儀字藻舟貴州貴筑人道光二年進士授直隸平谷縣歷署饒陽三河咸豐初遷大興京縣署南路同知補東路同知皆有治聲時海防戒嚴築甯河北塘大沽諸礮臺工堅費核平餘銀鉅萬悉以入官晉秩知府十年署順德捻匪北竄朝儀率鄉勇出禦嚴陣以待礮折大旗迄不動益使游騎左右馳突爲疑兵賊來則擊之退則寂守久之賊引去同治四年署廣平敗賊馬疇橋悉收難民入城料賊必復至儲糧械爲城守備已而賊衆數萬果逼城不敢犯城獲全

五年補大名馬學孟者故捻黨也善戰有勇力既投誠充團總潯滑內黃數縣民多附之其黨有殺人者遠近因傳學孟叛矣朝儀馳入其居曉譬利害學孟悟而泣願繳械請罪遂夷其寨赦勿問後朝儀與賊戰得學孟力故不收八年授永定河道署按察使先後任河道八年勤於職守痛革河工積弊課兵種柳資工用焉遼山東鹽運使尋擢順天府尹京畿靡薄朝儀廉勤率之捕劇盜抑豪強絕請託期年風習一變光緒七年卒官朝儀治河績尤著民立祠固安祀之

段起字小湖湖南清泉人初入資助饒敘道員咸豐初佐廣西左江道王普相幕數陳兵事普相薦諸巡撫勞崇光俾將百人從解全州圍別寇鄧正高乘虛襲永州窺衡州起單騎馳諭降其衆貴州叛苗犯懷遠起討平之奉檄率所部援江西謁曾國藩於軍中國藩未之奇也時賊踞建昌久不下起夜率四百人撲其壘克之乘勝復德安國藩乃納其軍七年從劉騰鴻李續宜攻瑞州騰鴻戰死起亦被重創卒克之八年援浙解衢州圍還攻景德浮梁並克之明年陳

王成犯景德起扼其衝賊不得逞出家財募勇遣別將率以援浙數有功巡撫
王有齡疏調起赴浙將水陸軍會以前功加鹽運使銜留江西以道員補用十
一年李秀成犯廣豐遂圍廣信起嬰城固守伺閒出擊賊敗之賊遂引去加布
政使銜同治元年授江西督糧道仍留治軍二年克鄱陽彭澤給瑚松額巴圖
魯名號三年始赴任時軍事漸定議撤兵起條上兵弁安置之策巡撫沈葆楨
疏請頒行武職借補及收標考課著爲令四年鮑超軍索饟譁潰起聞變馳視
遇前隊傷頗有識者大呼曰段糧道也皆棄兵拜起反覆開警變乃定尋兼署
按察使江西閩浙之交有山綿亘千里故爲盜藪久封禁賊未平時民往往入
山避亂久之生息日繁至是或頗言粵寇餘孽窟穴其中詔三省會剿起疑之
輕騎周歷詢訪悉其狀牒大吏疏請弛禁民德之立生祠祀焉六年以疾歸邑
大饑傾貲振贍全活逾萬家光緒二年再授江西督糧道調江南徐州道六年
兩廣總督張樹聲調治海防擢廣東鹽運使八年卒於官

丁壽昌字樂山安徽合肥人少爲里塾師粵寇擾淮南遂集里中子弟勸以兵

法築寨自保同治初率偏師從李鴻章東征轉戰蘇松間由知縣晉秩知府隨潘鼎新攻浙江克乍浦攝乍浦同知又隨克嘉興晉道員進攻湖州戰於晟舍鎮賊憑河爲險壽昌見水破其兩壘諸軍隨擊立克之湖州賊遂不振論功加按察使銜六年率師從劉銘傳剿捻迭敗之黃安鄧州賊南竄沐陽霖雨平地水數尺捻酋任化邦竄渡沐水而西壽昌先解衣率將士徒涉伐木爲梁濟軍既濟乃斷梁衆知無退路奮擊破賊追斬化邦贖榆城下詔以道員簡放加布政使銜又戰濰縣禽捻酋李芸等給西林巴圖魯勇號記名按察使八年天津民教構釁命壽昌率銘軍四千馳赴津沽備非常遂署天津道尋實授時人情洶懼譏言繁興壽昌處以鎮靜扶良詰姦屬境安堵救火會董積憤西教適大火相約不救教堂壽昌聞警奔赴略無眈域會董感其誠乃施救梁家園河隄將圯壽昌親執杵立水中衆益奮築隄獲全設廠以賑流民廬竈藩溷悉有程式會遭父喪士民奔走籲留者萬人堅請終制服除詔赴天津總理營務兼充海防翼長光緒四年署津海關道擢按察使署布政使以勤慎稱六年卒官賜

卹贈太常卿於天津建立專祠

曾紀鳳字摯民湖南邵陽人以諸生從軍浯保知縣駱秉章督四川調領湘果後管同治元年石達開竄踞敘州雙龍場分軍陷高縣紀鳳從按察使劉嶽昭赴援戰城下克之又迭敗之弔黃樓羅家均涉水先驅奪賊壘達開連營三十與橫江爲犄角紀鳳燬橫江西岸賊巢遂薄雙龍場計招賊黨爲內應而潛軍襲其後達開奔燕子灘邀於橫河半渡擊之遂竄滇境三年從克正安進圍綏陽屢戰有功曾知府尋調廣東又調貴州並任軍事十年與總兵鄧千勝克麻哈禽楊阿保管道員十一年會諸軍剿平苗民之梗化者貴州下游東西驛道苗在其南漢民在其北自咸豐時行旅阻隔垂二十年至是始通紀鳳辦理善後自黃平以上歷清平平越麻哈貴定二百餘里建礮七十分立四屯各設屯官戍卒六百分守之墾荒供餼責以巡緝姦宄無所容流民間風踵至十二年古州苗叛撥清江旁寨響應紀鳳率礮兵會諸軍進剿禽其酋長撫良苗百數十寨黔疆略定賜黃馬褂光緒元年授貴西道巡撫黎培敬深倚之薦可大用

擢按察使晉布政使十三年調雲南布政使剿猓黑及大蔓寨夷加頭品頂戴因請以其地改土歸流邊隅以安十五年乞養歸尋卒儲裕立字鶴樵湖南靖州人從軍貴州累保知縣同治初苗亂熾迭克天柱清江督知府十年署古州同知兵後凋劫羣苗伺釁出沒裕立修戰備撫遺黎民氣漸復仍統軍先後收復台拱丹江凱里諸城擢道員光緒三年下游肅清論功賞黃馬褂督治善後築城堡百二十七建義塾百三十九八年思南災裕立往賑徧歷災區日稽錢粟出入無假借實惠及民時遵義焚教堂民情洶洶裕立馳往撫諭與法人往復詰難事得解尋署貴西道再歷貴東糧儲二十一年卒賜卹如例

鐵珊字紹裴徐氏漢軍正白旗人咸豐中由筆帖式議敘知縣從欽差大臣勝保討捻山東單騎入賊壘招降捻匪劉占考散其黨數萬敘功以直隸州選用同治初發甘肅署通渭值回亂一歲九被圍嬰城固守卒得全日供軍糧萬斤民不堪命鐵珊規減其半民感德及去任攀轅不得行迭攝平番皋蘭中衛諸邑所至輒輕賦役輯流亡修城堡除盜皆總督上其治狀擢甯夏知府未之任

調蘭州議建貢院與陝西分試自光緒紀元始是年署甘涼道武威永昌鎮番
三邑共一渠民爭水械鬪久不決鐵珊爲開支渠別子母水設插刊石立均水
約輸日灌溉民大悅爲立祠渠上地宜牧因畜羊三千頭歲以蕃息用給貧民
無告者十三年擢河陝汝道禽巨盜李復岐等實諸法建陝州書院以課士文
風始振閩鄉城北濱河南臨澗水歲屢圯議築石壩殺水勢艱於鑿連竟得石
閩底鎮激湍中工遂成十六年夏淫雨河漲陝城不沒者數版民謂官能捍患
恃以不恐鐵珊復築石堤四月畢工身親其役竟以勞卒士民請建專祠詔賜

卹

桂中行字履眞江西臨川人先世賈貴州遂占籍鎮遠爲諸生成同間積軍功
爲知縣安徽署合肥蒙城阜陽曾國藩率師征捻檄中行察勘蒙城圩寨蒙城
故捻藪也中行單騎歷諸圩曉以利害擇良幹者爲圩長堅壁清野寇無所掠
禮接耆老賢士從詢方略得通捻姦民簿記之誅其魁桀數十人豪滑斂迹歲
餘威化大行民陷賊及遠徙者相率還歸以功晉知府調江蘇甯揚州正陽澄

惟光緒元年署徐州以祖母憂去官三年宣城建平民教闕焚毀教堂總督沈葆楨強起中行往治中行謂民倡亂當治如律然民所以亂由教堂侵其地今當令民償教堂財而教堂還民地持數月卒如中行議內艱歸服闋檄治皖南墾務皖南兵燹後客民占墾不輸賦至是清丈田畝無問主客客民噪捕斬其魁乃聽命三歲事竣增賦鉅萬九年補徐州值水災興工賑修隄埝二百餘又濬邳州艾山河築宿遷六塘埝水患除民以不饑治徐十二年課農勸士盜賊衰息擢岳常澧道數月遷廣西按察使復調湖南二十年卒中行所至有聲官江南最久民尤愛戴之附祀徐州曾國藩祠

劉含芳字薌林安徽貴池人同治初李鴻章率師東征從克蘇州司運糧械後隨征拾積功至道員鴻章督直隸命含芳治軍械天津得西洋利器省覽機括久之悉通其意鴻章方拓北洋軍備於西沽建武庫廣收博儲以肆將士擴充機器製造兩局募工做構創設電氣水雷學堂編立水雷營皆以含芳董其役光緒七年詔求人才以鴻章薦交軍機處存記時海軍初立造船塢旅順含芳

兼領沿海水陸營務處十四年署津海關道授甘肅安肅道留治海防尋調山東登萊青道監督東海關十九年始之任含芳自隨鴻章至天津凡十四載屯旅順十一載至是雖領一道猶隸於北洋二十年遼東兵事起海陸軍屢挫旅順威海相繼陷登萊青道駐煙臺敵軍日逼俄報軍艦沒於劉公島甯海亦陷敵前鋒距煙臺十餘里時巡撫李秉衡亦駐師烟臺西國諸領事言巡撫在則敵攻之急於租地不便巡撫乃退萊州領事復言含芳含芳曰巡撫大臣也可去某守土吏去何之今死此矣因置鴆兩孟案上與其妻郝盛服坐待意氣堅定民恃無恐有潰卒數千持兵喚呼求食含芳單騎馳諭處以空營重爲編伍不願留者厚給遣之費數萬金皆出私錢初西人聞潰卒甚戒嚴俄而散遣殊出不意咸稱道之和議成大臣奏遣渡海勘收還地始威海旅順大連灣皆荒島含芳瘁心力營構十餘年所成之險塞悉灰燼矣因憤慨流涕以疾乞歸卒贈內閣學士

游智開字子代湖南新化人咸豐元年舉人揀選知縣同治初李續宜巡撫安

徽調司釐惟以廉平稱四年署和州知州日坐堂皇決事又時出巡四境延見父老問其疾苦親爲諸生考校文藝剖析經旨教以孝弟廉讓期年治化大行禁胥吏整完糧賦爲民病築瀕江隄防自督工役費節而隄堅補無爲州署泗州治盜尤嚴曾國藩稱其治行第一移督直隸調智開署深州興義學減浮征民大悅補灤州俗建訟姦民居間交構痛懲之風稍稍息十一年擢知永平府一車一蓋周歷下邑得其情僞有事牧令未及報輒已聞知一日侵晨馳至邊安獄獄吏方私繫囚求賂即拘吏至縣庭笞之令錯愕驚起葺書院築城垣修郡志皆事舉無糜濫瀕海產鹽貧民資以衣食部牒禁私販疏官引智開上言民間少一私販即多一馬賊永平行官引不便事得寢有巨室以析產構訟久不決智開坐便室呼兩造至不加研鞫自咎治郡無狀變起骨肉望族如此況齊民乎訟者流涕請罷李鴻章疏陳智開清勤端嚴足厲末俗光緒六年擢永定河道員弁無敢離工次者左宗棠議改永定河道以南岸爲北岸智開以數百里城垣廬墓遷徙不便力爭而止十一年擢四川按察使攜一僕乘篋輿入

蜀清釐獄訟兩署布政使護理總督十四年遷廣東布政使署巡撫劾貪墨吏不避權要嚴賭禁卻聞姓賭商規餽尋以老乞休二十一年起廣西布政使地瘠少蓋藏務積穀備荒歉閱三年因病罷歸卒於家所至各省俱請祀名宦祠李川清字澄齋山西平定州人同治四年進士改庶吉士出大學士倭仁門散館授編修安貧厲節日研四子書朱子小學旁稽掌故於物力豐瘠尤所留意大婚禮成加侍讀銜十二年丁父憂徒步扶櫬返葬服闋入都仍課生徒自給光緒三年記名御史會山西奇荒巡撫曾國荃欽差大臣閻敬銘奏調用清襄賑務騎一驢周歷全境無間寒暑一僕荷裝從凡災情輕重食糧轉輸要道悉紀之冊深窮病源以爲省省嬰粟花田彌望無際必改花田而種五穀然後生聚有期元氣可復上書國荃詳論之國荃疑晉新荒禁烟效緩且全國未禁徒斂怨說竟不行賑竣卻保獎還京傳補御史引見有日矣法越事萌芽張樹聲以廣西邊防奏調樹聲督兩廣復調廣東任海防釐榷洗手奉職七年授惠州知府境故多盜喜博喜私鬪用清推誠化之俗乃稍革八年遷貴州貴西道明

年超擢布政使署巡撫實倉儲興農利裁冗員効缺額之提鎮禽粵匪莫夢弼等實諸法巡閱所至召士子講說經傳將吏環聽相與動容黔地土瘠多種罌粟暢行湘鄂贛粵諸省用清奏陳禁種之法分區限年時自出巡刈割煙苗言者疑其操之過急十一年秋有旨來京候簡召對猶痛陳罌粟疚國殃民狀冀可挽回萬一旋命署陝西布政使荒燹之後休養生息仍嚴煙禁十四年復命來京候簡遂以疾歸主講晉陽書院凡十年用清嚴於自治勇於奉公蒞黔時庫儲六萬年餘存十六萬陝庫三十萬再期六十餘萬矣所至尤措意桑棉織組營浚三源縣龍渠溉田千餘畝俸入不以自潤於黔以購粟六千石於陝購萬石備不虞鄭州河決捐工需二萬兩二十四年卒子貴陽扶柩歸以毀瘍同縣李希蓮字亦青咸豐十年進士授戶部主事再遷郎中性節儉官京曹三十年車馬廩餼不顧訕譏英法兵入都曹司多走避希蓮听夕詣署無間以忤肅順乞假歸同治元年起原官時軍興餽絀希蓮條陳開源節流數端恭親王奕訢避之雲南報銷案發同僚有穢職遣戍者希蓮獨無所染光緒中出爲江西

廣饒道除濫稅復徵額擢山東鹽運使調長蘆累遷貴州按察使陝西布政使戊戌政變希蓮頗憂大亂將起與總督陶模議籌建陪都及兩宮西幸人始服其先見云

李金鏞字秋亭江蘇無錫人少爲賈以試用同知投効淮軍光緒二年淮徐災與浙人胡光鏞集十餘萬金往賑爲義賑之始後遂賑直隸山東皆躬其役五年晉秩知府調直隸修西淀隄吳大澂督防吉林金鏞任瑋春招墾事界外蘇城溝墾戶數千苦俄人侵略相率來歸咸得奠居海參威既通商俄人援例要請東三省要地設領事嚴拒之又力爭八道河民被俄焚掠抵俄官於法將軍銘安以爲才疏留吉林任用中俄界約自瑚布河口循瑋春河至圖門江口以海中之嶺爲界嶺以西屬中國距江口二十餘里立土字碑界圖疎略致嶺西之罕奇毛琛崴等鹽場置綫外俄復於黑頂子地私設卡倫距江口幾百里矣大澂使金鏞會勘據約爭還侵地重立界碑署吉林知府整錢法開溝洫攤丁於地以蘇民困九年署長春應通判廳境爲蒙古廓爾維斯地初招流民墾墾

納租久之墾逾所領謂之夾荒民懼增稅因出錢免丈量刻石紀之至是蒙旗復牒理藩院請丈金鋪挾碑文謁將軍爲民請命曰誠知清丈則公與某各有所得然如民何將軍聞之愕然奏罷其事創建書院厚其廩俸購書數千卷資學者誦習捕斬劇盜苗青山等境內又安不時巡歷鄉僻呼召父老爲講孝弟力田金鋪性坦易口操南音所至民愛而憚之以功晉道員俄侵佔精奇里河四十八旗屯地在黑龍江岸東金鋪爭還補丁屯至老瓜林百七十餘里劃河定界漠河者在愛理西三界面俄地產金俄人覬覦之北洋大臣李鴻章議自開採以金鋪任其事陸路由墨爾根入水運由松花江入各行千餘里僻遠無人披斬荆棘於萬山中設三廠兩年得金三萬事事與俄關涉艱阻百端又開廠於黑龍江南岸札伊河旁之觀音山皆爲北徼名礦集商贖立公司流冗遠歸商販漸集收實邊之利焉十六年病卒工所贈內閣學士子漠河建祠

金福曾字若人浙江秀水人以諸生從軍先侍祖父衍宗溫州教授任籌團練助城守旋隨官兵肅清金處協守獨松關解杭州圍李鴻章器其才克蘇州檄

辦善後捻事起往贊徐州道張樹聲軍務捻衆北竄出防大名丁憂歸福曾積功已至知縣服闋赴江蘇歷署婁南滙吳江諸邑所至興學校課農桑理冤獄禁溺女勸墾沙田開濬河道多善政民有去思光緒初河南山西大疫吳人謝家福等倡義賑集四十餘萬金推福曾董其事四年秋至河南分賑洛陽等十二州縣新安澠池災尤重福曾創立善堂恤糈掩骼收贖子女購車馬若干輛代疲民應役開渠澗製龍骨車興水利又濬洛陽宜陽廢渠貫通伊洛灌田二萬頃五年賑山西虞鄉等十縣事竣移賑直隸時直隸水患方急持以工代賑之策七年疏大清河濬中亭河培千里隄福曾先援例以道員候選至是鴻章督直隸奏留總辦籌賑局福曾以淀地淤塞爲清河受病之源清丈東淀無糧地釐定葦租規復堡船八年濬東淀河道修築天津三河頭隄九年築子牙河隄展寬正河又別開支河王家口以洩盛漲十年畿東大水福曾疏青龍灣減河入七里海疏筐兒港減河入壩河淀並出北塘海口又開灑水各河以洩武清寶坻窪區積水十一年濬饒陽漳沱河十三年濬四女寺南運減河兩署水

定河道塞決口於下口別開新道又就大清河合流處別濬新河永定河水始直達天津海河山東河決數爲災鴻章輒檄福曾往助工賑親至蘇浙募貲會浙西大水巡撫崧駿復疏留福曾治工賑于是杭嘉湖三府各河次第疏濬會廷議濬餘杭南湖以福曾董其役明年工竣直魯又告災福曾已臥病猶力疾籌賑濟十八年卒鴻章等疏請優卹贈內閣學士福曾廉公好義歷辦工賑十餘年無日不勞身焦思治行卓然及其歿士民同聲惜之熊其英字純叔江蘇青浦人以貢生就訓導家福集金賑河南其英請行始事濟源濟源山僻小縣也災尤劇多方補苴次第以及他邑其英親履窮僻稽察戶口不避風雪食惟麥粥麪餅菜羹與飢民同苦初頭病瘍足病濕醫少愈仍從事不肯休遂卒於衛輝巡撫上聞詔許被賑各州縣立祠祀之家福字綬之吳縣人世以行善爲事聞豫省災呼籲尤切義聲傾動聞者風起自上海蘇揚及杭湖願助賑者衆日貲錢至家福門或千金或數千金不一年得銀四十三萬有奇凡賑二十七州繼其英往者七十四人家福才識爲時重於創辦電報及推廣招商輪船局

事多所策畫李鴻章尤賞之嘗疏薦稱有物與民胞之量體國經野之才金福曾亦聞而歎許焉家福歷保至直隸州知州卒不仕時又有吳江紳富沈中堅鬻田三十頃親往山西賑災亦義行之尤著者

童兆蓉字少芙湖南甯鄉人同治六年舉人從軍陝西積功晉知府光緒三年署榆林歲祲便宜發倉復運粟於包頭甯夏單騎臨賑既而大疫延榆綏道及榆林令皆遽歿代者不至兆蓉一身兼攝三官比戶存問爲具醫藥全活甚衆六年署延榆綏道屬郡荒僻士儂民貧爲拓學舍購書勸課教民樹藝畜牧治榆溪河開渠溉田民利之八年授興安知府汰胥役禁私錢總兵余虎恩販錢爲利獲而燬之稅胥索賈人金榜治幾死民間婚娶苟簡爲定禮制禁淫祀葺昭忠節孝祠以正民志安康令徵糧苛急民聚而譁兆蓉往撫諭總兵及釐局挾前嫌誣爲激變遂解任尋得白署漢中逾年還本任川匪擾境擒斬其渠賊潰走調西安攝督糧道定徵糧改折上下稱便二十六年擢浙江溫處道先署杭嘉湖明年乃之任值拳匪亂後瑞安民楊茂奶與教堂積釁浙東法國主教

趙保祿尤橫挾兵船至溫州必欲殺楊兆蓉力爭曰彼法不當死我不能殺人
以媚人卒拒之以此名聞颶風爲災賑糶並舉民不乏食三十一年卒於官
論曰光緒初各省重吏治監司大吏下逮守令皆一時之選朝儀以下諸人或
禦亂保民或治盜清訟或興學勸業或救災恤患莫不以民生爲重承兵燹後
辛苦凋殘之人得生存以至今日者實賴於此民亦勞止汙可小休惠此中國
以爲民遂誠知本哉

清史稿

列傳二百三十九

洪汝奎

楊宗濂

史樸

史克寬

沈保靖

朱其昂

朱其昂

宗源瀚

徐慶璋

徐慶璋

崩光典

陳適聲

潘民表

潘民表

唐錫晉

婁春蕃

洪汝奎字琴西湖北漢陽人道光二十四年舉人咸豐初考取官學教習期滿以知縣用參甘肅藩軍事同治初洊保至江南道員總理糧臺供應防軍及他省協餉又籌還西征洋債出入逾二千萬綜核名實不避嫌疑光緒中沈葆楨爲兩江總督尤倚任之葆楨治尙威猛因疾在告輒疏請汝奎代治事聲望益起會詔求人才大臣交章論薦五年特擢廣東鹽運使調兩淮裁冗費建義倉濬揚州城河方欲大有爲而江甯三牌樓之獄起先是有棄尸三牌樓竹園旁

汝奎令參將胡金傳偵獲僧紹宗等仇殺謝姓男子又稱薛姓名亦屢易汝奎請覆訊葆楨以會匪自相殘卽置大辟逾三年得眞盜周五沈鮑洪等殺朱彪事時地悉合事聞命尙書麟書侍郎薛允升往江南卽訊金傳坐濫刑失入治如律汝奎失察褫職遣戍葆楨以前卒免議於是朝旨申戒各行省慎重刑獄並禁嗣後武員毋庸會鞫汝奎至戍所未幾赦歸遽病卒宣統初總督端方疏陳其治行復原官

楊宗濂字藝芳江蘇無錫人咸豐末以戶部員外郎在籍治團練時錢鼎銘乞師於曾國藩宗濂偕行及李鴻章以援師東下宗濂率舊部爲軍導屢著戰績劉銘傳進剿江陰宗濂率濂字營守楊舍賊來犯宗濂領沙團擊卻之沙團者起於江岸集衆自衛以技勇名賊皆畏之攻無錫宗濂任前鋒與賊酋黃子澄鏖戰夜奪北門入拔其城合攻常州宗濂督戰西門架浮橋獨騎先進馬驚逸墮河躍起易騎再進揮兵肉薄登遂擒陳坤書江南平隨鴻章移師勦捻總理營務處軍興所至索官車吏民交困宗濂創立車營行軍所需預爲儲峙隨時

無不備諸軍仿其制皆稱便積功擢道員同治十一年權湖北荆宜施道被劾罷鴻章創北洋武備學堂奏起宗濂總其事成材甚衆光緒十六年授直隸通永道時畿輔大潦宗濂主振事假便宜發帑粟復大治水利修潮白青龍薊運北運通惠永清各河疏渠樹防闢膏腴數萬頃士民刊碑頌德以憂歸再起爲山西河東道歷權布政使按察使邊長蘆鹽運使二十六年聯軍犯天津宗濂督蘆勇登陴固守飛丸裂左脛血流如濟猶裹創治軍城陷巷戰又傷右股命駐保定督糧臺旋隨鴻章入都議和事定賞三品京堂未幾以病乞休卒

史樸字蘭畦直隸遵化州人以進士用知縣分廣東歷惠來乳源南海等縣所至有威惠潮陽盜鄭段基殺前令樸蒞任立捕誅之晉羅定知州留省捕刺盜劉亞才及餘盜九百並置諸法粵省海盜久爲患樸航海往勦降盜魁張十五仔等盡散其黨數千有不受撫者勦平之擢知府勦英德土匪遇伏佛岡沒深澗崖木得不死賊踵至睨之曰史公也爭引出跪進飲食樸責以大義數且誓誓絕粒賊益敬畏羅拜感泣願縛渠自效會救至昇之歸詔革職仍令自効匪

平復故官粵東匪起省城戒嚴守徽德礮臺連破沙灣菱塘新竈各賊巢賞孔
雀翎知肇慶府梧州被圍督兵往援拔其衆還軍封川且戰且守會英人陷廣
州大府不遑西顧樸與賊相持五閱月大小數十戰殺賊數千人其後賊大至
會提督崑壽水陸並進大戰封川江口連捷殲賊軍遂復梧州晉道員再權肇
羅道同治二年移廣州攝按察使旋署糧儲道樸在粵前後垂四十年善治盜
尤善用人南海隸爲盜誣特出之後督捕得其死力撫瓊盜易名入伍多死敵
省闕乏餉出勸募立集百萬金賊初起獨主撫及踞梧則主勦皆得其機宜光
緒二年以籌解西征協餉加鹽運使鄉舉重逢賞二品服四年卒史克寬字生
原安徽六合人咸豐年與兄克諧辦鄉團禦賊太湖陷克諧殉克寬從克太湖
宿松解六合圍以國子監典簿保知縣同治初劉銘傳勦捻移征西回皆挾克
寬與俱爲司償運及營務處叙功擢知府光緒中李鴻章督畿輔檄董工程局
掌河事治漕汜於獻縣朱家口闢減河三十里循子牙河故道入海鴻章上其
績狀因奏任清河道民立石頌其德旋以他事被劾奪職遂歸

沈保靖字仲維江蘇江陰人咸豐八年舉人父燿盞湖北通判武昌陷罵賊被害保靖出入賊中覓遺骸三載始得死事狀得賜卹立祠李鴻章督師上海招參幕事積功至道員同治十一年授江西廣饒九南道時英使訂約燕台議於江西湖口輪舟停泊起卸貨物保靖以有碍九江關稅務力爭之總署卒廢約擢按察使攝布政使光緒七年遷福建布政使法越事起方事急城閉錢米歇業居民洶洶將爲亂保靖出諭發庫款三十萬以濟市面人心始定以他事被劾奪職旋復官遂不復出所著有讀孟集說韓非子錄要怡雲堂內外編等朱其昂字雲甫江蘇寶山人同治初從軍攻南潯城賊願降要一人入盟無敢往者其昂毅然請入受其降城始下旋納贖爲通判累至道員北洋大臣李鴻章頗奇其才福州船政造軍艦不適用奏改商船其昂與其弟其詔弼議官商合辦請設輪船招商局鴻章上其事遂檄爲總辦御史董傳翰劾以力小任重下鴻章查覆仍力贊其成於是官商合力開局集股並收併外人所設旗昌輪船公司以保航權數年成效大著光緒初直晉災其昂輸私財力任賑撫以勞

致疾鴻章特委權津海關道越三日卒詔優卹贈光祿寺卿其詔字翼甫納貨
爲知縣累至道員歷充江浙漕運事輪船招商局既成復請以額定漕運費給
輪船代爲海運局基始固再權永定河道時出巡河堤上下務盡其利弊遇伏
汛暴漲督三晝夜不交睫親督弁兵搶護始免潰決民皆德之擴充天津電報
學堂成材益廣時方議辦海軍醫學堂其詔復捐自置天津法租界地四十畝
爲校址以成之其急公好義類如此未幾卒贈內閣學士

宗源瀚字湘文江蘇上元人少佐幕洊保至知府光緒初官浙江歷署衢州湖
州嘉興府事敏於吏事判牘輒千言在湖州濬碧浪湖興水利時太湖漶港淤
塞前守楊榮緒疏濬無功會有疏陳治法者下郡源瀚乃議大興工役所規畫
甚備榮緒回任卒成之補嚴州兵後調做多溫台客民寄墾習於剽劫廉治其
魁道散歸者六千人治嚴五載煦嘔山民穿渠灌田引東西湖以洩新安江之
暴漲旱潦不害每巡行田野勸民力穡調霽波通商事繁有戈鋌者素豪猾爲
英國領事主文牘積爲姦利病民源瀚發其罪狀牒上大吏及南北洋大臣逐

鯤海外法國兵船犯浙洋源瀚從甯紹台道薛福辰籌海防多所贊畫數有功
晉道員署杭嘉湖道二十年日本搆兵調溫處道沿海戒嚴處以鎮靜清內匪
捕誅盜渠十餘人疆圉晏然又三年卒於官源瀚優文學尤精輿地所繪浙江
輿圖世稱之

徐慶璋字興齋浙江山陰縣人初佐都興阿戎幕累保知縣歷任奉天寬甸蓋
平義州晉興京同知所歷多善政常微行市中遇有訟爭者輒爲剖其曲直而
遣之倡修養濟院收養貧民興俗畚耨慶璋集村氓語以農事不可違時之
義衆承其訓有早種一天早收十天之諺至今誦之光緒二十年由鳳凰廳調
遼陽知州值中日戰亟省東南各縣相繼淪陷僅遼陽爲盛京門戶賴先事籌
備募餉練兵號鎮東軍沿邊設防自遼陽而岫巖海城復縣三千六百村士民
編團數萬人以遼南岫峒徐珍爲練長勅以兵法日兵至慶璋語衆曰敵迫矣
援師未集汝等自爲計毋與我偕亡我死分也衆感奮皆請殺敵遂迭敗日兵
俘百數十人戰守歷五越月長順依克唐阿方督戰皆倚以爲重屢詔嘉獎是

時州西連年水災復募款捐濟全活無算慶璋才而負氣其平日爲政寬猛兼施衆畏之如秋霜愛之如冬日有徐青天之稱和議成擢甘肅慶陽知府遷甘涼道積勞致病卒於官徐珍字聘卿遼陽人剛正多勇略日軍犯遼珍獨率民團守吉洞峪扼險堅持敵不得逞慶璋旣屬以練長會將兵者忌之飭散團衆防務遂弛而吉洞峪鄉團之名乃著于中外事定以抗敵出力保用縣主簿拳匪亂作珍復辦民團聯數百村有匪卽剿捕不分畛域匪攻騰蛟堡及荒溝先後剿平之日俄之戰珍嚴守中立不稍假藉總督趙爾巽嘉珍功以辦團成績上有上不支官款下不取民財徒以忠義之故護衛鄉間保全無算之語懋保至知府武昌變起土匪假革命名嘯聚煽亂爾巽知珍義勇委充巡防營幫統分防遼陽海城岫巖本溪四城地方賴以安謐尋以巡防改編陸軍遂辭職卒後州人建專祠祀之

卨光典字禮卿安徽合肥人父德模見循吏傳光典幼慧八歲能詩隨父官江南所師友多當代名儒聞見日擴名亦日起其論學務明羣經大義而以六書

九數爲樞紐治六書則必求義類以旁通諸學識雙聲以明假借性強記有口辯尤熟於目錄掌故有所論難援據該洽莫能窮也光緒九年進士授檢討典貴州鄉試與其副不相下以狂倨見譏然榜發稱得士充會典館圖繪總纂精密勝於舊中東兵起發憤上書不報遂乞假歸總督劉坤一聘主尊經書院講席光典念國勢弱在列諸人惟鄂督張之洞有大略又嘗所從受業師也因往說之洞慎選才俊習武備爲異日革新庶政之用之洞韙之卒不果而聘爲兩湖書院監督二十四年敍會典館勞以道員發江南創辦江寧高等學堂大學士剛毅按事江南司道百餘人同詣謁獨延光典密室縱談國事語切直剛毅大憾即議減高等學堂光典力爭不能得拂衣去坤一兩解之檄赴鹽城丈樵地樵地者故鹽場葦蕩也年餘得可耕之地七萬五千頃收入荒價亦鉅萬領正陽關督銷局歲增銷官引百數十萬會之洞代坤一爲總督以江南財匱用不足議增貨釐光典謂增新釐則病商毋甯整齊鹽課之洞因奏陳兩淮鹽事衰旺謂北鹽視正陽銷數南鹽視儀棧出數光典爲江南治鹽第一督正陽既

有績請使主儀棧期三年成效必可觀詔允之光典既莅事以輪船駐大江三要區首金焦次三江口次沙漫洲輔以兵艇私梟斂迹始儀棧出數不足四十萬引比三年增引十餘萬歲益課釐銀百五十餘萬乃益增募緝私兵隊日夕訓練成勁旅又於十二圩設學堂建工廠遂隱然爲江防重鎮三十二年授准揚海道加按察使銜實應饑民刦米令潛逃適光典舟至剴切諭解之而揚州亦以饑民刦米告調知猾胥陰煽衆卽禽治胥大吏怒將窮其獄以光典言得免運河盛漲光典先分檄河員增修隄而自泊舟高郵守視壩險工迭出大吏以故事視節候測水檄啟壩不爲動歷月餘啓二壩七月杪乃啟三壩下河六縣獲有秋建言淮海災區廣宜寬籌賑金不宜設粥廠使災民膾集費不貲且生事與布政使繼昌議不合會奉檄入都參議改定官制遂去任後江北賑事欸絀而費糜一如光典言三十四年命赴歐洲監督留學生諸生不樂受約束輒相訾謗歲餘謝職歸詔以四品京堂候補充京師督學局長宣統二年赴南洋提調勸業會卒於江甯

陳通聲字蓉曙浙江諸暨人光緒十二年進士改庶吉士授編修出爲松江知府鹽梟久爲患通聲到官密致其黨爲導帥健卒策疾騎踵百餘里掩其魁捕之寘諸法松窪下數苦潦濬支河三十餘並籌歲修費數萬金以澤農以憂歸卒禍起暨俗素強與教仇不逞者轉相煽惑衆至千餘城鄉約期將爲亂通聲獨命輿往喻之望與衆遇勢汹汹斫輿前衝深寸許正告之曰吾楓橋陳某也來活爾爲指陳利害衆悟且泣皆羅拜爭棄械而走而城中莠民忽遽起通聲促官守閉城捕其魁五人斬以徇事立平縣北江蘗村賭窟也每歲十月吳越賭徒紛集一擲累千金破家者無算通聲請於大吏屆時縣官蒞邸坐禁著爲例數百年敝俗至此而革服除以勞遷道員入參政務練兵稅務諸政三十三年授川東道川東盜藪也蒞任未浹旬開縣寇萬餘躡旁縣立平之次年黔中盜魁劉天成結獨邊通寇撓川南防軍數爲所敗省檄練軍七營勦之寇至委械去通聲立募精勇數百人部以兵法疾馳赴援未匝月生縛天成歸江北廳產煤礦脈綿延數百里至合州奸民私售龍王洞於英商外務部與訂租約胥

江北廳礦產授之復要展拓至石牛溝且蔓及兩川川人憤將與英商角道聲力爭之英領事並密屬川人收石牛溝左右地英商以無佗地可得得溝與洞猶石田也恫喝百端不爲動卒以賤值贖回治渝兩載大吏交章論薦遽引疾歸當軸數招之謝不出著有明逸民詩崎廬稗說及詩集等

潘民表字振聲江蘇陽湖人同治十二年舉人光緒初數募金賑直隸河南山西諸行省十五年山東河決凡賑歷城齊河臨邑齊東濟陽惠民商河青城濱霑化海豐陽信蒲臺十三州縣閱四年始竣災民無歸者衆民表於歷城臥牛山建屋五百間窩棚千間居之使植桑麻興耕織疾病婚嫁皆有資助別建工廠百間義塾八所設教養局董之因其規畫歷十年之久多有藝成自給者乃以經費改設蒙養學堂十九年賑山西大同邊外豐鎮諸廳亦做臥牛山成法收集教養之尋以州同就職山東署恩縣補平度權泰安知府二十八年河決利津詔頒內帑十萬大吏檄民表去任專賑事督道員發陝西筦農工商礦局民表認同官縣土質宜磁建磁窑同官興大利資竭將中輟請兼塾屋監榷以

羨餘助磁業仍不給且虧稅計無所出竟仰藥死時論惜之民表瘁於賑務二十餘年每遇災祲呼籲奔走置身家不顧敝衣草履躑躅泥塗面目黧黑非人所堪資斧悉自貸及服官俸入悉以償賑債充賑用自義賑風起或從事數年由寒儒而致素豐如民表之始終無染歿無餘資者蓋不數親賑作霖字佑之丹徒人以儒生奮起司賑事自光緒二年始至三十年歷賑山東河南山西安徽江蘇直隸廣西奉天陝西數行省每兼涪河修隄以工代賑作霖性強毅赴事勇決綜覈無糜費久而爲人所信故樂輸者衆其施賑不拘成法隨時地而取其宜當時疆吏以義賑可矯官吏拘牽延緩積習樂倚以集事作霖不求仕進輒辭薦剋僅受國子監助教銜數被溫詔嘉焉積賑餘資興揚州鎮江兩郡善舉及歿子良沛出二十餘萬金爲恤糗保節備荒等用成其遺志云

唐錫晉字桐卿無錫人父文源閩門列粵難積尸滿井亂平錫晉拾親骨瀝血取驗誓奉遺訓力行善光緒初聞豫省災始募義振十四年以恩貢授安東縣教諭時准徐海大水錫晉棹小舟往賑憂勞甚鬚髮爲白明年安東撈益募金

振之冬復振山東沿海諸郡災爲置常平倉二十六年兩宮西狩關中大饑人相食錫晉釀金四十萬往振歷二州八縣艱困不少阻災區廣振款且匱乃單車詣行在請於大學士王文韶得二十萬金益之事竣返安東坐劾安東知縣貪殘同落職兩江總督端方等奏復錫晉官改銓長洲後以輸金助振保道員三十二年湘中災官紳復以振事屬秋淮浦被水流氏數十萬洶衆喻遣勿散咸曰有司行振不足恃必得唐公時錫晉臥病猶強扶而至衆見其來驩曰吾生矣乃各還歸待振遂以無事宣統三年方籌振江皖而武昌變起錫晉憂憤病日劇越歲卒錫晉治振自乙亥至辛亥凡三十有七年其振地爲行省八山西河南江蘇山東以及陝西湖南東至吉林西至甘肅其振款過百萬以上義振之遠且久無過錫晉歿後衆思其德受振各省咸請立祠祀之

婁春蕃字椒生浙江紹興人以貢生納質爲同知歷保道員久參北洋幕府李鴻章尤重之常倚以治繁劇春蕃熟諳直隸水利永定河常歲決思患預防以時消息之河不數病長蘆鹽商久困增釐春蕃務爲寬大課裕而商不撓尤精

刑律審覈維慎直省遂無冤獄拳亂作力主勦辦爲總督裕祿草奏痛陳邪術萬不可信戰絆萬不可開以一服八決無倖理裕祿初頗信之不能堅持卒致敗裂匪以通敵誣紳富請搜殺春蕃力阻多保全事亟春蕃首請召鴻章北上停戰議和及聯軍猝至同僚皆走春蕃獨留不去艱苦謀措拄至一月之久鴻章至復參和議約成辭優保辛亥事起人心惶惑春蕃夙夜籌慮獨爲地方謀保安焦勞益甚猝病卒春蕃敦節操有經濟才自鴻章延入直幕先後垂三十年歷任總督如王文韶榮祿袁世凱楊士驤端方陳夔龍等皆敬禮之雖不樂仕進未親吏治而論治佐政留意民生各郡縣皆奉爲圭臬歿後直人思其德公請附祀鴻章祠

論曰各省監司能著聲績者大抵多起於守令蓋親民之效焉及兵事興而有軍功幕職捐例開而有輸餉助振雖其初不必盡親吏治而以實心行實政流愛於人民之感之亦豈有異自汝奎宗濂以至錫晉春蕃諸人德惠在人後人稱之至今不可敬哉